

四川大學古籍整理研究所編

儒藏

史部

第五十五冊

四川大學出版社

四川大學古籍整理研究所 編

儒藏·史部

儒林年譜

第五冊

四川大學出版社 二〇〇七年

新學堂
PDG

國家「211工程」重點學科建設項目

國家「985工程」創新基地規劃項目

中國孔子基金會重大項目

目錄

韓文類譜續	宋·呂大防	程俱	洪興祖	編撰	魏仲舉	輯刊		一
柳先生年譜	宋·文安禮	編撰						一一五
范文正公年譜	宋·樓鑰	編撰	范之柔	補遺				一四七
安定先生年譜	胡鳴盛	編撰						二八七
石徂徠年譜	許毓峰	編撰						三一
廬陵歐陽文忠公年譜	(舊題)宋·胡柯	編撰						三三五
增訂歐陽文忠公年譜	清·華萼亭	編撰						四〇一
直講李先生年譜	宋·魏峙	編撰						五三七
眉陽三蘇先生年譜	宋·何掄	編撰						五七五
濂溪先生周元公年表	宋·度正	編撰						五九五
周濂溪年譜	許毓峰	編撰						六五九
曾南豐先生年譜	王煥鑣	編撰						七二七



衡齋藏

韓文類譜卷第五

韓子年譜起永貞元年至元和五年。

丹陽洪興祖慶善

順宗永貞元年乙酉移江陵法曹參軍。

呂云二十年甲申移江陵掾以

四門博士召非是。

順宗實錄貞元二十一年正月丙申上卽位。二月甲

子大赦。八月辛丑改永貞元年。縣齋有懷云。嗣皇新

繼明。卽此年也。張署墓誌云。與同輩韓愈李方叔俱

爲縣令南方。二年俱徙掾江陵。杏花詩云。二年流竄



出嶺外。二年、謂甲申、乙酉。送文暢詩云、三年竄荒嶺、通癸未歲也。送區宏云、我遷於南、日周圍、謂七年春到陽山、今春遇赦、曰一周天也。河南同官記曰、永貞元年、自陽山移江陵法曹。蓋公今春遇赦、夏秋離陽山、俟命於郴者三月、其受命在秋末也。祭李郴州云、俟新命於衡陽、費薪芻於館候。輟行謀於俄頃、見秋月之三鼓。逮天書之下降、猶低回以宿留。郴在衡山之南、故曰衡陽。自郴至衡、有合江亭。寄刺史鄒君詩云、維昔經營初、邦君實王佐。注云、此亭故相齊公映

作、蓋映罷相後、自夔移衡也。窮秋感平分、新月憐半破。時月未望也。祭張署云、衡陽放酒、熊咆虎嘯、不存合章、罰籌蝟毛。委舟湘流、往觀南岳。公有謁衡岳廟、遂宿岳寺題門樓詩云、我來正逢秋雨節、陰氣晦昧、無清風。自衡至潭、陪杜侍御遊湘西寺、獨宿有題云、是時秋初殘、暑氣尙未斂。時月向晦矣、自此泛洞庭。阻風贈張十一云、十月陰氣盛、北風無時休。卽祭文云、避風太湖、七日鹿角者。旣至岳州、別竇司直於岳陽樓云、朝迴宜春口、宜春袁州。夜纜巴陵洲、巴陵岳

州也。寶庠字胄卿，時以武昌幕大理司直權知岳州。劉夢得賡韓侍御岳陽樓詩云：「假守亦高臥，墨曹正垂耳。」契闊話溫涼，壺觴慰遷徙。北史：裴訥之爲平原公，墨曹掌書記。通典云：司法參軍，或謂之法曹，或謂之墨曹。又云：故人南臺舊，一別如弦矢。今朝會荆蠻，斗酒相宴喜。劉與退之嘗同官，此詩卽夢得貶官過江陵所作也。初公在郴時，八月十五日夜贈張功曹云：「昨者州前槌大鼓，嗣皇繼聖登夔臯。赦書一日行萬里，罪從大辟皆除徙。遷者追迴流者還，滌瑕蕩

垢清朝班。州家申名使家抑。坎軻祇得移荆蠻。是年八月憲宗受禪、公兩遇赦矣。

按、是年八月五日憲宗卽位、此十五日詩也。所謂嗣皇繼聖登夔皋及州家申名使家抑、只謂順宗赦也。別本昨者作昨日、然使家抑之言、恐不緣再赦也。

又赴江陵塗中、有寄贈王二十補闕、李十一拾遺、李二十六員外翰林三學士詩。諱行錄云、王二十涯、李十一建、李二十六程也。詩云、昨者京使至、嗣皇傳冕



旆赫然下明詔、首罪誅共兜。謂貶王伾、王叔文也。永貞行云、太皇諒陰未出令、謂順宗卽位時。嗣皇卓犖信英主、謂憲宗也。又云、郎官清要爲世稱、荒郡迫野嗟可矜。時柳宗元自禮部員外貶邵州刺史、劉禹錫自屯田員外貶連州刺史、柳再貶永州司馬、劉再貶朗州司馬、皆坐交文叔也。^①具書目見非妄徵、蓋公嘗謫陽山故也。送孟瑯秀才序云、今年秋見孟氏子於郴。其十月、吾道於衡潭、以之荆。孟瑯、元和五年進士、見雁塔題名。嘗著嶺南異物志。荆潭唱和詩序云、



僕射公開鎮荆蠻、統郡惟九、常侍楊公領湖南之壤地二千里。僕射裴均、常侍楊憑也。憑以是年冬自湖南移江西、裴均事見河南同官記。十二月、上李巽侍郎書云、應舉覓官二十年矣。自貞元二年至今二十年。又云、南行詩一卷、卽所謂百篇在吟者。五箴云、幕中之辨、謂在徐州時。臺中之評、謂爲御史時。序云、余生三十有八年、卽此年也。一作四十八。按十八年與崔羣書云、左車第二牙脫去、兩鬢半白、頭髮五分亦白其一。祭老成云、吾年未四十、而視茫茫、而髮

蒼蒼而齒牙搖動。自今年來、蒼蒼者或化而爲白矣、動搖者或脫而落矣。此云髮之短者日益白、齒之搖者日益落。明年感春云、冠欹感髮禿、語誤悲齒墮。以此觀之、公未四十時屢有此歎、知作四十八爲誤也。是年有鄭夫人殯表。

憲宗元和元年丙戌夏、召爲國子博士。

順宗實錄云、永貞二年丙戌正月丙寅朔。韓本作正月丙戌朔、誤矣。是年正月改元和元年、蓋憲宗卽位之踰年也。和張十一憶昨行云、憶昨夾鍾之呂初吹。

灰杜公禮罷元侯迴。杜佑貞元十九年春自淮南節度入朝拜檢校司空也。

杜公古本作社公。公時任江陵法曹元侯謂帥裴均也。言裴均罷社而享客故其下謂車載牲牢甕舁酒並召賓客延鄒枚其義甚明洪誤矣。伍文未揃崖州熾憲宗卽位始貶韋執誼爲崖州司戶故也。有李花云祇今四十已如此。時年三十九寒食出游夜歸贈張十一云念君又署南荒吏署墓誌云徙掾江陵半歲。邑管奏君爲判官不行。又云明宵



固欲相就醉。有月莫愁當火令。時春末夏初也。

此寒食詩也。謂禁火也。魏武帝有寒食禁火明罰令。非謂夏初也。東坡嘗爲李公擇書此詩。又作有月莫辭燈火冷。不知當時所據何本也。

鄭羣贈簞。唐本注。羣時以殿中侍御史佐江陵軍。○釋言云。元年六月。自江陵召拜國子博士。請復國子監生徒。狀云。今聖道大明。儒風復振。當在此年。

狀當從歷官記以附長慶元年。

答張徹云。放行五百里。月變三十莢。漸階羣振鷺。入



學誨螟蛉。自十九年冬謫陽山。至今夏召還。積三十
月矣。豐陵行。是年七月葬順宗於豐陵。游青龍寺。贈
崔大羣補闕云。秋灰初吹。季月管。是年九月也。贈崔
立之評事云。復聞王師西討蜀。霜風冽冽摧朝菌。伐
劉闢在今春。平蜀在今秋。故征蜀聯句曰。始去杏飛
蜂。及來柳嘶蜚。秋雨聯句亦云。因思征蜀士。未免溼
戎旆也。城南聯句云。驅明出庠鬢。會合云。天居覲清
拱。納涼云。今來沐新恩。同宿云。生榮今分踰。諸聯句
皆還朝後作。送文暢北遊云。昔在四門館。晨有僧

來謁。謂貞元十九年爲四門博士時。昨來得京官。謂今年被召。照壁喜見蝎。甚言北歸之樂也。僕射領北門。謂田季安。相公鎮幽都。謂劉濟。是年有祭十二兄。岌文并墓誌。

二年丁亥。分敎東都生。

元和聖德詩序云。外斬楊惠琳。劉闢以收夏蜀。東定青徐。積年之叛。郊天告廟。神靈歡喜。謂元年楊惠琳據夏州叛。三月辛巳。夏州兵馬使張承金斬惠琳。傳首以獻。九月辛亥。高宗文奏收成都。擒劉闢以獻。十



月壬午淄青李師道十一月戊申武寧張愔皆受命。
二年正月己丑朔上親獻太清宮太廟辛卯祀昊天
上帝於郊丘。是日還宮御丹鳳樓大赦天下。先是將
及大禮陰晦浹辰享獻之辰景物晴霽人情忻悅序
列二年事詩云正月元日謂此年是也。四門博士
周况妻韓氏墓誌云開封尉俞之女開封卒從父弟
愈於時爲博士乞分敎東都生以收其孥於開封界
中敎育之。李翱云權知國子博士宰相有愛公文者
將以文學職處公有爭先者爲飛語公恐及難遂求